

SC

Skina di
CLYDE

Momentonan Conmovedor E Nochi di Reapertura di Joe Laveist Sport Park

Skirbi pa: Clyde Harms

SC Luna pasa a tuma luga e tan espera reapertura di JLSP den un ambiente festivo cu baseball como tema principal. Baseball, pasobra ta e deporte aki Joe Laveist a practica exitosamente te na un edad grandi.

E programa di prome anochi a cuminsa cu homenahe especialmente na nos pelotero y umpirenan di antaño cu a yega di actua den e sport park aki, e tempo ey nombra Lago Sport Park.

E anochi a cuminsa manera un reunion di partidario y adversario riba diamante di baseball di hopi aña pasa. Hungado y umpire, tur tabata muestra un placer grandi y sincero di topa otro na un evento asina importante pa deporte na nos isla. Pa esnan cu ta bibando "overtime" (pasa di e edad expectativa) nan participacion por tabata un "last hurrah", pero ningun di nan tabata pensa riba esey. Nan a bin pa saborea e momento.

Ta dificil pa no sinti un tristesa ora bo mira e estrago cu e añanan a haci cu hendenan cu bo ta corda como atleta agil y fuerte. Pero nan a haci acto di presencia pa ricibi un aplauso, tal bes pa e ultimo biaha, di un parti di e publico cu a mira nan hunga personalmente y ta corda nan y nan logronan cu admiracion, of e mayoria di e publico cu a tende of lesa di nan logronan, pero cu ta aprecia nan mescos.

E homenaheadonan mas hoben tabata cana cu mesun zjeito cu tempo cu nan tabata hunga, pero mayoria tabata lastra pia of cana poco poco cu baston, uno tabata riba rolstoel. "Gabi" Illidge taba tey faltando un brasa cu el a perde despues di un bataya largo contra un enfermedad cruel. Tur tabata contento di ta na reapertura di e sportpark caminda nan a cosecha logro memorabel. E persona cu mas aplauso a ricibi ta e incomparable Carlos Lake kende a actua di umpire pa hopi aña despues di un carera exitoso como pelotero den e epoca di gloria di Joe Laveist. Bisti cu su sombre, na edad di 96 aña ainda Carlos Lake tabatin e fortaleza di ricibi su recuerdo cu un minimo di ayudo.



Carlos Lake na edad di 96 aña ta ricibi aplauso di e fanaticonan e anochi di reapertura di Joe Laveist Sport Park. Otronan ta MinPres Eman, Gobernador Refunjol, Minister Schwengel y Minister de Meza.



Clyde Harms a presenta na Minister Schwengel un cuadro cu e articulo cu el a skirbi riba bida di Joe Laveist manera cu el a sali den AweMainta di Toko

Despues di impresion tur hende cu su "wind-up" Min. de Meza a manda un rolling inocente den direccion di homeplate y pa colmo patras di e batido. Esaki tabata e unico momento decepcionante di un nochi masha bon planea y ehecuta pa locual Veroushka Croes y Cherryldine Buckley merece un aplauso fuerte. Min. de Meza mes a keda desapunta cu su "ball, behind and low".

Pa hopi e momento mas impactante e anochi ey tabata ora cu nos Gobernador, Sr. Freddy Refunjol a haya su reconocimiento como un strea riba diamante di baseball y un deportista sobresaliente den otro deportenan.

A toca nos Prome Minister, Sr. Mike Eman pa haci e presentacion. Recordando e situacion politico fastioso cu a emerge dos aña pasa cu a causa nos Prome Ministro bay den welga di hamber, mi tabata wonder con esaki lo caba.



MinPres Mike Eman, Gobernador Freddy Refunjol (68), Minister Alex Schwengel, Minister Mike de Meza ta disfruta di e bunita show di vuurwerk pa termina e ceremonia di reapertura di Joe Laveist Sport Park 27 di november, 2015. Na man robes, Ruben "Scorpio" Garcia, e MC di e anochi.

Tur dos ta hende cu mi a aprecia y admira pa hopi aña. Sr. Refunjol den su capacidad di Minister di Enseñansa y como Gobernador semper a respalda Aruba Scholarship Foundation tempo mi tabata dirigi e organizacion ey. Mi vinculo cu e familia di Sr. Mike Eman ta bay bek te tempo cu mi tabata tuma les di piano di su tanta "Fi" Eman na cas di su abuelo Shon Henny den Schelpstraat. Por cierto mi tabata aya dia cu familia Eman a ricibi e telegram cu Shon A, tata di Mike, a gradua na Corsow como abogado.

Al final, deporte a transcende diferencianan politico. Na Joe Laveist Sport Park, tur politikeria a wordo poni un banda. Pa mi y e otro miles presente, tabata un felicidad grandi pa mira con e dos Arubianonan respeta y admira a brasa otro. E momento mas conmovedor di un anochi yen di momento conmovedor.



Prome Ministro Mike Eman y Gobernador Freddy Refunjol ta felicita otro e anochi di reapertura di Joe Laveist Sport Park

Por contact Clyde Harms via: clydeharms@yahoo.com